

Topografia grischuna sin DVD

La nova «swiss map 25» è gist cumparida

■ **(anr/vi) Dapi trais emnas è ella sin il martgà – la charta digitala dal Grischun. La nova DVD cuntegna tuttas 44 chartas geograficas da 1:25 000 dal Grischun e custa 178 francs.** Tgi che va gugent a far turas – saja quai da stad u d'enviern – enconuscha las chartas brinas da l'Uffizi federal per topografia. Ellas èn bunamain indispensablas, sch'ins va per las muntognas, ed ellas tutgan en mintga satgados d'alpinist. Uss datti tuttas chartas svizras er en furma digitala.

Pussaivel be cun DVD

Avant intgins onns ha l'uffizi per topografia a Berna cumenzà a vender chartas geograficas en furma digitala. L'emprim han ins pudì far quai sulet cun las chartas da mesura gronda, sco 1:100 000 e 1:50 000. Per las chartas pli detagliadas n'avev ins gnanca gè in purtader da datas adattà. Pir dapi ch'i dat DVD's èsi pussaivel da memorisar avunda datas sin in purtader ch'è adattà per la vendita.

La stad 2005 è cumparida l'emprima DVD sut il titel «swiss map 25» cun la regiun da Berna. Ed avant trais emnas ha l'uffizi da topografia edì l'ultima da las otg chartas digitalas da la Svizra – quella cun il Grischun. Ch'ins haja fatg il Grischun pir il davos, haja da far cun l'actualisaziun da las chartas. Uschia saja la charta digitala sin il pli nov stan, hai numtar l'uffizi per topografia.

Tge cuntegna la DVD grischuna?

«8-Graubünden» è il num da la DVD. Ella cuntegna il material da 44 chartas dad 1:25 000 che cuarclan bunamain l'entir Grischun. I manca dentant il Mesauc. Per il solit surpassan las chartas ils cunfins chantunals e passan viadent en l'Italia, l'Austria u en Glaruna. Sulet sisum la Surselva manca anc ina zinsla. I sa tracta da las duas chartas Amsteg (1212) ed Alpsura (1232). U ditg pli simpel: Mustér è anc sin la DVD, Tujetsch betg pli.

Tgi che less cumprar ina DVD che cuntegna la cumpletta Surselva, fa meglier da cumprar «7-Ticino». Lezza cuntegna davent da Cuir ensi l'entira Val dal Rain anteriur ed anc la Val dal Rain posteriur. Persuenter mancan l'Engiadina, la Purtenza ed il Grischun central.

Cun tuttas schicanas

Cun la charta digitala na pon ins betg sulet contemplar la topografia, anzi ins po era sa servir d'ina software che porscha da tuttas pussaivladads. Tgi che vul, po clamar giu las sendas da viandar normalas, las sendas da muntogna u las sendas alpinisticas. Plinavant datti infurmaziuns tar ils chastès e las turs d'ina regiun. Cun colliaziun d'internet pon ins sa metter en contact cun las uniuns turisticas da la regiun giavischada.

Fitg simpel èsi da chattar in flum, in piz u ina vischnanca. Ins sa serva simplamain da la funcziun da tschertgar. Tgi che planisescha ina tura, po schizunt stampar ora il profil d'atezza e laschar quintar ora il temp da viandar. I dat era pliras funcziuns da GPS.

Cunfins tecnics

Ma per ir sin viadi e per metter en il satgados è la DVD dentant anc adina betg rufinada avunda. Senza computer u laptop na pon ins far nagut cun il sfratg da datas sin la schiba glischanta. Per far ina tura èsi perquai anc adina meglier d'avair l'usitada charta da palpìri. La charta digitala è plitost adattada a chasa per la planisaziun da tura.

Dapli infurmaziuns chatt'ins sut: www.swisstopo.ch



Cun «swiss map 25» pon ins clamar giu mintga detagl.



La DVD cuntegna il material da 44 chartas geograficas.